

見類如此明年秋八月中宮賜冠服之寵甲寅春掌教眞常李君以普天醮事具書召師時年八十有六不敢以老耄辭比至燕疾篤以六月二十六日於長春宮方壺脩然而逝門人捧柩西歸葬於劉蔣之仙蛻園師生平雖不讀書四方衣冠之士相待甚厚在燕則主萬慶淡游趙復仁甫敬鉉鼎臣在秦則紫陽楊奐姚左轄樞來獻臣明之邵郎中邦用輩皆挽之以詩及作文致祭刻石於佑德之靜復堂讀之平日道業自可見矣

圓明真人

師姓高氏字道寬字裕之世爲應州懷仁縣之豪族質貌魁偉襟度夷曠以明昌乙卯歲七月十九日生幼不同羣兒戲狎旣

道藏輯要

祖庭內傳

卷

翼集一
X 111

長讀書通經史大義性尙雅淡每有出塵遠引之思以二親在堂莫遂其志及大安兵興雲應當其衝卽挈家避地居長安隱身爲刀筆吏旣而考妣俱下世喪祭如禮一夕露坐家庭夜將半忽覩光明如晝仰視西北天門大闢紅霞翠靄之間瓊林琪樹寶殿瑤臺厯厯具見須臾復闔自是學道之心益切興定辛巳聞章臺街蓬萊菴全眞安君有道卽捐家棄累執弟子禮安君愛其勇決教以摧強挫銳寬欲治心爲修身之本師佩服玄訓弊衣糲食味道思眞晏如也正大改元游汴梁依丹陽觀沖虛李君參進上道沖虛俾服勤勞以資福德師躬執爨汲之役數年不怠沖虛授之道要丙戌金主遣中使詣鳳翔徵洞眞于

君仍命李冲虛選精嚴道人一員副行冲虛召師前曰師資契遇實關冥理洞真吾方外友昔嘗蒙丹陽長春二師真印可真玄門之宗匠今上命有請汝可偕往他日興起吾道作成爾業者其斯人歟敬之哉師受教而行洞真既至汴奉命提點中太一宮師居席下朝叩夕請其於道德性命之學有所進癸巳汴京下師乃北渡上燕都尋居德興之龍陽觀頤神毓浩若將終身焉戊戌春洞真召還燕從演教白霄庚子冬又從入關興復終南祖庭是時經營會葬祖師之際師多方化導裨贊其用戊申洞真賜號圓明子署知重陽萬壽宮及提點甘河遇仙宮事且語之曰人徒知枯坐息思爲進道之功殊不知上達之士圓

道藏輯要

祖庭內傳

卷

翼集一
×××

通定慧體用並修卽動而靜雖撓而甯爲無爲事無事同塵和光此老氏之微旨也今玄化盛興汝當奉此應緣扶教接物利生以爲登真達道之基汝後必負教門重任事雖稠疊慎無憚是皆庸玉汝於成也師叩頭跪進曰仙真妙旨實非凡俗所聞今日見教請事斯語由是儉以治身寬以莅眾不數載內外道眾莫不得其歡心識者嘆服以洞真爲知人壬子春掌教真常李君祀香祖庭俾師充京兆路道錄從事十年事有成而無替道中統辛酉誠明真人張君詣關保奏宣授陝西興元等路道教提點兼鎮重陽萬壽宮事至元戊辰夏皇姪永昌王賜金冠錦服辛未嗣教真人純真王君贈號知常抱德圓明尊師未幾

永昌王再賜洞觀普濟圓明真人號癸酉春皇子安西王開府
六盤師一見應對稱旨薦賜冠服乙亥夏召師就行宮修金錄
羅天大醮自將事之日迄於筵終瑞雲十圍靈應昭著備見於
參政商君所作投龍冊碑茲不贅述無幾何中宮又以冠服見
賜寵諭優渥丙子秋七月安西王頒降璽書益以西蜀道教併
付掌管師典領教門踰二十年專尚德化未嘗一施政刑在祖
庭則繼勅南昌上宮泊五祖大殿其餘府庫藏廩增葺者甚多
雖一穉子參請亦必以禮相接未嘗有自得驕慢之色形於顏
間教事繁劇物來卽應皆曲中其理每至夜分澄神靜坐達旦
不寐其修真鍊養之功習以爲常以是年踰八旬步履康強精
道藏輯要

祖庭內傳

卷

翼集一

川文文

神充懌上而王公下迨黎庶莫不待以殊禮故得教門靜肅道
眾乂安四方陰受其福者爲不少丁丑春正月上旬忽得微疾
侍者勸進藥師曰死生如旦暮乃物之常理奚藥石可延分外
之筭耶至二十四日遂不食終日危坐談話如平昔但教人以
進道之語翌日奄然順化於所居之靜室享春秋八十有三越
五日葬於宮之仙蛻園送葬道俗踰萬人其平生道力自可見
矣